

IKHWAN AL-MUSLIMIN DAN PERJUANGAN MENEGAKKAN PEMERINTAHAN ISLAM DI MESIR, 1948-1954

(Ikhwan al-Muslimin and the Struggle in Establishing the Islamic Government in Egypt, 1948-1954)

Mohammad Redzuan Othman* & Abu Hanifah Haris**

Abstrak

Kajian ini membincangkan perjuangan Ikhwan al-Muslimin bagi menegakkan pemerintahan Islam di Mesir, bermula dari tahun 1948 hingga tahun 1954. Tempoh tersebut dianggap antara tempoh penting dalam politik Mesir kerana pada tahun 1948, negara Israel diwujudkan di bumi Palestin dan Mesir terpaksa berperang dengan Israel buat kali pertama, manakala tahun 1954 menyaksikan Ikhwan al-Muslimin telah diharamkan dan ramai anggotanya telah ditangkap dan dijatuhkan hukuman. Kajian ini menggunakan pendekatan kualitatif dan kaedah kajian perpustakaan dengan menganalisis pelbagai sumber primer dan sumber sekunder. Dapatan kajian mendapati bahawa kematian Hasan al-Banna pada tahun 1949 merupakan titik-tolak yang mengubah perjalanan gerakan tersebut kerana pemimpin gerakan tersebut selepas Hasan al-Banna tidak mampu menandingi kepimpinan dan keperibadian beliau, malah kematian beliau juga menjadi antara faktor utama kepada kegagalan gerakan tersebut. Meskipun Ikhwan al-Muslimin merupakan sebuah organisasi yang paling berpengaruh di Timur Tengah, tetapi gerakan tersebut tidak berjaya menguasai politik Mesir dan negara Arab, malah gerakan tersebut ditewaskan oleh *Free Officers* dengan jumlah anggota yang lebih kecil. Ikhwan al-Muslimin juga telah membuat beberapa perhitungan politik yang gagal, termasuklah kepercayaan yang diberikan kepada Jeneral Mohamed Neguib sehingga akhirnya menyebabkan gerakan tersebut diharamkan dan ramai anggotanya ditahan oleh Gamal Abdel Nasser pada tahun 1954 kerana bersekongkol dengan Neguib.

Kata Kunci: Ikhwan al-Muslimin, Hasan al-Banna, Gamal Abdel Nasser, *Free Officers*, Mesir

Abstract

This study discusses the struggle of the Ikhwan al-Muslimin in establishing the Islamic government in Egypt from 1948 to 1954. This period was considered important in Egypt's political history because 1948 marked the establishment of the Israeli state in Palestine and Egypt was forced to fight with Israel for the first time. In 1954, Ikhwan al-Muslimin was banned and many of its members were arrested and sentenced. This study uses qualitative approach and library study method to analyze various primary and secondary sources. The findings of this study reveal that the death of Hasan al-Banna in 1949 was a turning point that changed the journey of the movement because Hasan al-Banna's succeeding leader was unable to compete with the former's leadership and personality. Hasan al-Banna's death was also a major factor in the failure of the movement. Although Ikhwan al-Muslimin is the most influential organization in the Middle East, the movement has not succeeded in mastering the politics of Egypt and Arab countries. Moreover, the movement was defeated by Free Officers with smaller members. Ikhwan al-Muslimin has also made some failed political calculations, including the credentials given to General Mohamed Neguib who eventually led the ban on the movement. Many members were then arrested by Gamal Abdel Nasser in 1954 for conspiring with Neguib.

Keywords: Ikhwan al-Muslimin, Hasan al-Banna, Gamal Abdel Nasser, *Free Officers*, Egypt

Pendahuluan

Tahun 1948 hingga 1954 dianggap antara tempoh penting dalam perkembangan politik Mesir. Pada tahun 1948, negara Israel diwujudkan di bumi Palestin dan Mesir terpaksa berperang buat kali pertama dengan negara yang baru dibentuk itu. Kekalahan yang dialami menyebabkan politik Mesir menjadi tidak stabil. Hal ini mendorong sekumpulan pegawai tentera yang menggelarkan diri mereka sebagai *Free Officers* bertindak merampas kuasa dan menamatkan pemerintahan beraja di negara tersebut. Rampasan kuasa ini menampilkan Gamal Abdel Nasser, seorang tokoh yang bukan sahaja berjaya membina imejnya di Mesir, tetapi juga di seluruh Dunia Arab. Untuk meniti tangga kejayaan, Nasser bukan sahaja berjaya menyingkir rakan-rakan yang tidak sehaluan dengannya, tetapi yang lebih penting beliau berjaya memusnahkan pengaruh Ikhwan al-Muslimin, sebuah gerakan Islam yang paling berpengaruh di Mesir ketika itu. Tahun 1948 hingga 1954 juga merupakan tahap

* Mohammad Redzuan Othman (Ph.D), Profesor Dato' Dr., merupakan Presiden dan Naib Canselor, Universiti Selangor (UNISEL), Shah Alam, Selangor, Malaysia. Email: redz8182@gmail.com.

** Abu Hanifah Haris (Ph.D) (corresponding author), merupakan Pensyarah Kanan di Jabatan Sejarah, Fakulti Sastera dan Sains Sosial, Universiti Malaya, 50603 Kuala Lumpur, Malaysia. Email: abuhanifah@um.edu.my.

terpenting dalam penglibatan Ikhwan al-Muslimin dalam proses politik di Mesir. Pada akhir tahun 1940-an dan awal tahun 1950-an, gerakan ini berjaya muncul sebagai sebuah organisasi yang paling mendapat sambutan rakyat apabila berjaya mengatasi pengaruh yang sebelum ini secara tradisi dimonopoli oleh Parti Wafd.

Sebagai organisasi massa yang memperjuangkan kesedaran Islam, Ikhwan al-Muslimin berjaya memainkan peranan menggerakkan penentangan rakyat terhadap pendudukan British di Mesir ketika itu. Apabila meletus peperangan di Palestin berikutan kebanjiran pendatang haram Yahudi, Ikhwan al-Muslimin merupakan satu-satunya organisasi yang berjaya menghantar sukarelawan terlatih untuk membantu saudara sesama Islam menentang penganas Zionis.

Tahun 1949 pula menyaksikan pengasas dan pemimpin Ikhwan al-Muslimin iaitu Hasan al-Banna mati ditembak. Kematian beliau meninggalkan kesan yang amat besar terhadap corak dan nasib masa depan gerakan tersebut. Kekosongan pemimpin selepas kematian Hasan al-Banna mencetuskan perebutan kuasa dalam kalangan pucuk pimpinan Ikhwan al-Muslimin berikutan perbezaan pendekatan dalam menangani persaingan dan pergolakan yang berlaku di Mesir pada waktu itu. Kepimpinan organisasi yang tidak mantap dan sealiran menyebabkan Ikhwan al-Muslimin tidak berjaya mengemukakan alternatif berkesan dalam penampilannya bagi menyaingi Nasser dan *Free Officers* yang semakin berjaya mendominasi politik Mesir. Kemelut dalaman yang berlaku dan ketiadaan pemimpin sewibawa Hasan al-Banna menyebabkan Ikhwan al-Muslimin berdepan dengan konflik dalaman yang serius. Ikhwan al-Muslimin juga hanya memainkan peranan yang kecil ketika Revolusi Julai 1952 dilancarkan, walaupun merupakan sebuah pertubuhan yang paling berpengaruh

Pada masa yang sama, hubungan antara Ikhwan al-Muslimin dengan *Free Officers* yang merampas kuasa pada mulanya berjalan dengan baik, tetapi kemudiannya bertukar menjadi konflik berlanjutan hampir enam dekad. Konflik tersebut sampai ke kemuncaknya apabila Nasser yang telah membuat persiapan yang sewajarnya dengan bersekongkol dengan pihak British bertindak menjatuhkan Ikhwan al-Muslimin. Sejak itu, bermulalah siri pengharaman dan penindasan ke atas gerakan tersebut. Akibatnya, ramai pemimpin dan anggota Ikhwan al-Muslimin terpaksa berhadapan dengan pelbagai tindakan kejam, malah ramai anggota gerakan tersebut telah dihukum mati atau menjalani hukuman penjara yang panjang.

Hasan al-Banna dan Ikhwan al-Muslimin

Ikhwan al-Muslimin merupakan sebuah gerakan Islam yang diasaskan di Ismailiyya oleh Hasan al-Banna pada tahun 1928. Hasan al-Banna bukanlah seorang ahli falsafah atau seorang pemikir dalam erti kata sebenar, tetapi beliau adalah seorang yang mempunyai kemampuan yang tinggi dan kefahaman Islam yang mendalam. Di bawah kepimpinan Hasan al-Banna, Ikhwan al-Muslimin berjaya menjadi model gerakan Islam yang mampu menghadapi cabaran semasa.¹ Pendekatan yang diberi penekanan terpenting oleh Hasan al-Banna dalam proses melatih ahli-ahlinya ialah membina fikrah mereka supaya menjadi seorang Muslim dalam erti kata yang sebenarnya. Ini dilakukan melalui pendekatan usrah dan tarbiah yang terbukti berjaya melahirkan ahli-ahli yang mempunyai disiplin yang tinggi terhadap perjuangan mereka.

Pada masa yang sama, Ikhwan al-Muslimin turut memberikan tumpuan kepada bidang ekonomi dan sosial dalam usaha menyebarkan lagi kegiatan dakwahnya. Dalam bidang ekonomi, Ikhwan al-Muslimin berjaya menubuhkan kilang tekstil, syarikat perniagaan, dan syarikat pengiklanan. Dalam bidang sosial pula, Ikhwan al-Muslimin menubuhkan sekolah dan pusat perkhidmatan kesihatan selain mewujudkan kelas petang di seluruh negara. Ternyata Ikhwan al-Muslimin di bawah pimpinan beliau berjaya membawa gelombang dan nafas baru kepada masyarakat Mesir seterusnya memberi impak yang besar kepada percaturan politik Mesir.²

Sokongan terhadap kegiatan Ikhwan al-Muslimin bukan sahaja mendapat sambutan di Mesir, tetapi juga di negara-negara Arab yang lain di Timur Tengah. Ketika kemuncak kegemilangannya, Ikhwan al-Muslimin berjaya mewujudkan lebih 2,000 cawangan di seluruh Mesir dengan keanggotaan dianggarkan seramai 2 juta orang. Di samping itu, pergerakan itu juga berjaya menubuhkan cawangan-cawangannya di Syria, Iran, Afrika

¹ Menurut laporan British, Ikhwan al-Muslimin diasaskan bagi menubuhkan kerajaan Mesir berdasarkan prinsip al-Quran sebenar dan menentang pergantungan terhadap kebudayaan Barat yang bertanggungjawab menjatuhkan moral masyarakat dan mendedahkan umat Islam kepada kesengsaraan. Lihat "Aims, Objects, and Programme", P.I.C. Paper No. 49, *The Ikhwan El Muslimeen*, h. 1, dalam WO201/2647, *The Moslem Brotherhood: Political Intelligence Paper*. Untuk maklumat lanjut tentang latar belakang Ikhwan al-Muslimin, lihat Richard P. Mitchell (1993), *The Society of The Muslim Brothers*, London: Oxford University Press; Annette Ranko (2014), *The Muslim Brotherhood and Its Quest for Hegemony in Egypt: State-Discourse and Islamist Counter-Discourse*, Heidelberg: Germany: Springer; Noman, Sattar (1995), "Al Ikhwan Al Muslimin" (Society of Muslim Brotherhood) Aims and Ideology, Role and Impact", *Pakistan Horizon*, Vol. 48, No. 2, h. 7-30.

² Shamsul Azhar Yahya, Mohamad Redzuan Othman & Abu Hanifah Haris (2017), "Tahalluf Siyasi Dalam Perjuangan Ikhwan al-Muslimin di Mesir, 1970-1981", *Jurnal Hadhari*, Edisi Khas, h. 185.

Utara dan Pakistan.³ Jumlah sebenar keahlian Ikhwan al-Muslimin tidak dapat dipastikan dengan jelas. Menurut laporan perisikan British di Kaherah pada tahun 1942, ahli Ikhwan al-Muslimin pada waktu itu dianggarkan seramai antara 100,000 hingga 500,000 orang.⁴

Laporan Polis Kaherah menyebut jumlah ahlinya seramai antara 200,000 hingga 500,000 orang.⁵ Mitchell berpendapat ahli gerakan tersebut berjumlah 300,000 hingga 600,000 ketika zaman kegemilangannya (1946-1948), sebelum merosot sekitar 200,000 hingga 300,000 pada tahun 1953.⁶ Kaplinsky juga menganggarkan ahlinya ketika itu di sekitar 200,000 hingga 500,000 orang.⁷ Perbezaan dalam membuat anggaran ini berlaku kerana gerakan tersebut sendiri tidak mempunyai rekod lengkap berkenaan jumlah sebenar ahli mereka. Satu lagi ialah disebabkan terdapatnya perbezaan dalam mengkategorikan jenis ahli antara ahli yang membayar yuran dengan mereka yang hanya menjadi penyokong. Banci penduduk Mesir pada tahun 1937 menunjukkan bahawa negara tersebut mempunyai penduduk seramai 15.9 juta orang, dan meningkat kepada 19 juta orang pada tahun 1947. Walaupun berjaya merekrut ramai ahli, namun latar belakang mereka yang menyertai gerakan tersebut memperlihatkan bahawa Ikhwan al-Muslimin lebih berjaya menarik keahlian dalam kalangan kelas menengah dan penduduk bandar. Walaupun terdapat ramai petani dan penduduk desa yang menyertai gerakan tersebut, tetapi peratusnya agak kecil.⁸

Bertepatan dengan kedudukan Ikhwan al-Muslimin sebagai gerakan Islam yang memperjuangkan Islam secara menyeluruh, Hasan al-Banna sering menegaskan bahawa Islam yang menjadi landasan perjuangan Ikhwan al-Muslimin bukan Islam yang hanya memberi penekanan kepada persoalan ibadah dalam erti kata yang sempit, tetapi merangkumi perkara yang berkaitan dengan urusan negara dan ummah. Seluruh umat Islam dianggap sebagai satu ummah dan tidak boleh dipisahkan antara satu sama lain oleh batas-batas geografi.⁹ Sebarang bentuk pencerobohan ke atas mana-mana wilayah yang diduduki oleh umat Islam pula dianggap sebagai pencerobohan ke atas umat Islam secara keseluruhannya. Walaupun dengan pendekatan Islam secara menyeluruh yang diperjuangkan oleh Ikhwan Muslimin, namun Hasan al-Banna masih berpendapat bahawa keagungan Islam hanya boleh dicapai dengan mengembalikan keagungan bangsa Arab. Untuk itu, beliau menekankan batapa perlunya diwujudkan perpaduan Arab sebagai prasyarat bagi mengembalikan keagungan Islam. Beliau juga tidak yakin Islam boleh dibangunkan oleh bangsa lain selain daripada bangsa Arab.¹⁰

Hasan al-Banna juga telah menubuhkan Pasukan Bersenjata Ikhwan al-Muslimin yang diletakkan di bawah pengawasannya akibat suasana yang bergolak selepas tamatnya Perang Dunia Kedua serta ancaman Zionis di Palestin.¹¹ Pasukan ini mendapat sanjungan kerana peranan yang dimainkan semasa meletusnya Perang Arab-Israel 1948-1949. Kekalahan yang dialami oleh negara Arab menyebabkan timbulnya kebencian terhadap pemerintahan beraja. Pendudukan British di Mesir juga dipertanggungjawabkan sebagai sebab utama kekalahan tersebut. Dengan pengalaman dan pemilikan senjata, anggota Pasukan Bersenjata Ikhwan al-Muslimin telah memainkan peranan dalam mencetuskan serangan bersenjata. Sasaran utama mereka ialah semua kepentingan British dan penyokongnya serta kumpulan lain yang menjadi saingan mereka.

Selain itu, Pasukan Bersenjata Ikhwan al-Muslimin turut memainkan peranan dalam mencetuskan suasana politik yang tidak stabil di Mesir terutamanya sepanjang tahun 1948 dan 1949. Tindakan yang dilakukan oleh segelintir anggota Ikhwan al-Muslimin adalah di luar pengetahuan Hasan al-Banna, malah beliau sendiri tidak merestui tindakan tersebut. Antara keganasan politik yang dipertanggungjawabkan ke atas anggota Ikhwan al-Muslimin termasuklah pengeboman rumah Abdul Fatah Amr Pasya, seorang tokoh politik pro-British, pengeboman rumah Mustapha Nahhas Pasya, serangan ke atas pejabat kumpulan akhbar Eropah di Kaherah iaitu *Orientate de Publicate* dan percubaan bunuh ke atas Komandan Polis Kaherah, Salim Zaki Pasya.

³ Temu bual dengan Said Ramadan yang dipetik daripada *Middle East Report*. Lihat "Muslim Brotherhood Leader Explains its Aims and Activities," *Middle East Report*, Vol. VI, No. 3, October 1953.

⁴ FO 141/838, The Ikhwan Muslimin Reconsidered, 10 Disember 1942.

⁵ FO141/1005, Egypt: Political Situation, 23 September 1945.

⁶ Richard P. Mitchell (1993), *The Society of The Muslim Brothers*, h. 328.

⁷ Zvi Kaplinsky (1954), "The Muslim Brotherhood", *Middle Eastern Affairs*, December, h. 377.

⁸ Lihat kajian kes tentang keanggotaan Ikhwan al-Muslimin dalam Wi Kupferschmidt (1982), "The Muslim Brothers and the Egyptian Village", *Asia and African Studies*, Vol. 16, h. 159-161.

⁹ Zahar Ishaq Ansari (1961), "Contemporary Islam and Nationalism: A Case Study of Egypt", *Die Welt Des Islams*, Vol. VII, h. 12.

¹⁰ Hasan al-Banna (1984), *Risalah Mukhtamar Kelima Ikhwan Muslimin*, Terj. Alias Osman, Kuala Lumpur: Pustaka Salam, h. 69.

¹¹ Keprihatinan Ikhwan al-Muslimin terhadap isu Palestin dan perjuangan rakyat Palestin yang menentang kekejaman Zionis bermula sejak tahun 1936 lagi apabila Hasan al-Banna menyeru umat Islam agar berjihad bagi membela rakyat Palestin yang ditindas. Lihat Abd al-Fattah Muhammad El-Awaisi (1998), *The Muslim Brothers and the Palestine Question 1928-1947*, London: Tauris Academic Studies, h. 14-15; Israel Gershoni (1986), "The Muslim Brothers and the Arab Revolt in Palestine, 1936-39", *Middle Eastern Studies*, Vol. 22, No. 3, h. 367-368.

Lanjutan daripada peristiwa tersebut, pemerintah Mesir di bawah pemerintahan Parti Sa'dist pimpinan Nukrasyi Pasya bertindak mengisytiharkan pengharaman ke atas Ikhwan al-Muslimin pada 8 Disember 1948 dengan alasan gerakan tersebut terlibat dalam mencetuskan kegiatan keganasan. Serentak dengan itu, kerajaan mengumumkan penangkapan 32 orang yang dikatakan anggota Ikhwan al-Muslimin bersama-sama dengan sejumlah senjata, bahan letupan dan dokumen yang dihubungkan dengan kegiatan keganasan yang berlaku.¹² Namun begitu, Hasan al-Banna menafikan bahawa senjata dan bahan letupan tersebut digunakan untuk kegiatan keganasan kerana jelas bertentangan dengan dasar gerakan tersebut yang tidak akan mencetuskan kegiatan sedemikian.¹³ Sebaliknya senjata dan bahan letupan ini digunakan untuk peperangan menentang Zionis di Palestin, malah kewujudannya diketahui oleh pemerintah Mesir.¹⁴ Walaupun ramai anggota Ikhwan al-Muslimin ditangkap setelah pengharamannya, tetapi Hasan al-Banna tidak ditangkap kerana tidak ada bukti yang boleh menghubungkan beliau dengan keganasan yang berlaku.¹⁵

Tindakan mengharam dan menangkap anggota Ikhwan al-Muslimin atas arahan Perdana Menteri Mesir, Nukrasyi Pasya menyebabkan beliau menjadi sasaran cubaan bunuh oleh beberapa anggota gerakan tersebut. Pada 28 Disember 1948, Nukrasyi Pasya telah mati ditembak ketika berjalan masuk ke pejabatnya di Kementerian Luar. Pembunuhnya ialah seorang anggota Ikhwan al-Muslimin, iaitu Abdul Meguib Ahmad Hasan, pelajar bidang veterinar yang menyamar sebagai anggota polis. Pembunuhan Nukrasyi Pasya juga telah menyebabkan peningkatan lingkaran keganasan antara penyokong Ikhwan al-Muslimin dengan pemerintah.

Hakikatnya, tindakan keganasan yang dilakukan oleh beberapa kalangan anggota Ikhwan al-Muslimin sebenarnya ditentang keras oleh Hasan al-Banna.¹⁶ Pada masa yang sama, beliau sendiri mengakui kegagalan beliau mengawal kegiatan tersebut. Hal ini bukan sahaja menjejaskan imej Ikhwan al-Muslimin, tetapi juga membahayakan masa hadapan gerakan tersebut. Jawatan Perdana Menteri kemudiannya diambil alih oleh Ibrahim Abdul Hadi yang meneruskan dasar kekerasan terhadap Ikhwan al-Muslimin. Anggota gerakan tersebut juga ditangkap secara beramai-ramai dan ditahan di khemah-khemah tahanan, manakala harta benda mereka dirampas. Usaha Hasan al-Banna bagi mengendurkan keadaan tersebut dengan memberi jaminan bahawa gerakan tersebut tidak berniat untuk mencetuskan suasana tidak stabil dalam negara dianggap hanyalah sebagai helah untuk meyakinkan pemerintah supaya tidak mengambil tindakan ke atas Ikhwan al-Muslimin.¹⁷

Walau bagaimanapun, keengganan pemerintah untuk menangkap Hasan al-Banna sebenarnya menandakan bermulanya zaman penindasan yang terpaksa dihadapi oleh Ikhwan al-Muslimin. Walaupun Hasan al-Banna masih boleh bergerak bebas, tetapi setiap pergerakan beliau telah diintip. Pada malam 12 Februari 1949, Hasan al-Banna telah mati ditembak di hadapan ibu pejabat pertubuhan Syu'ban al-Muslimin oleh mereka yang kemudiannya terbukti terdiri daripada Pasukan Polis Rahsia Mesir. Kematian beliau bukan sahaja mengubah nasib masa depan gerakan yang diasaskannya, tetapi juga nasib masa depan politik Mesir. Kematian Hasan al-Banna menyebabkan Revolusi 1952 dipimpin oleh orang lain dan bukan dalam kalangan pemimpin Ikhwan al-Muslimin. Jika beliau masih hidup, kemungkinan besar sejarah Mesir adalah berbeza daripada apa yang terdapat pada hari ini.¹⁸

Peluang Ikhwan al-Muslimin untuk berkuasa di Mesir juga semakin malap selepas kematian Hasan al-Banna kerana gerakan tersebut sukar untuk mencari pengganti yang dinamik seperti beliau.¹⁹ Kematian beliau dianggap menyelamatkan pemerintahan beraja dan cubaan rampasan kuasa di Mesir untuk beberapa tahun lagi kerana ketiadaan tokoh yang setanding dengan beliau yang mampu menggerakkan usaha tersebut.²⁰ Kematian Hasan al-Banna juga meninggalkan kesan negatif kepada organisasi yang diasaskannya. Di samping terpaksa menghadapi tekanan daripada pemerintah, Ikhwan al-Muslimin juga terpaksa berhadapan dengan pergolakan dalaman bagi menentukan siapakah yang paling layak untuk mengambil alih jawatan Murshid al-Am Ikhwan al-Muslimin. Kepimpinan Hasan al-Banna selama 20 tahun dalam Ikhwan al-Muslimin tanpa dicabar memberikan kesan positif dari segi pembinaan gerakan tersebut, tetapi meninggalkan kesan yang negatif dari segi penyediaan pelapis kedua dalam kepimpinan. Perebutan kuasa dalam kalangan pucuk pimpinanlah menjadi faktor dalaman terpenting yang akhirnya menyebabkan hancurnya penglibatan Ikhwan al-Muslimin dalam politik Mesir.

¹² Hasan al-Banna (1984), *Risalah Mukhtamar Kelima Ikhwan Muslimin*, h. 69.

¹³ Ishak Musa al-Husaini (1956), *The Moslem Brethren: The Greatest of Modern Islamic Movement*, Beirut: Khayat's College Book Cooperative, h. 21.

¹⁴ Abdul Muta'al al-Kabbari (1986), *Pembunuhan Hasan al-Banna*, Bandung: Penerbit Pustaka Bandung, h. 150.

¹⁵ FO141/1271, Arab Societies: Ikhwan El Muslemeen, 9 Disember 1949.

¹⁶ Untuk keterangan lanjut, lihat *al-Jumhur al-Misri*, 5 Februari 1948. Dipetik daripada Ishak Musa al-Husaini (1956), *The Moslem Brethren*, h. 21.

¹⁷ FO371/73463, Political Situation in Egypt, 18 Januari 1949.

¹⁸ Murray Clark Havens, Carl Leiden dan Karl M. Schmitt (1970), *The Politics of Assassination*, California: Parentice Hall Inc., h. 105.

¹⁹ Enver M. Koury (1970), *Pattern of Mass Movement in Arab Revolutionary Progression*, States, Hague: Mouton & Co., h. 135.

²⁰ FO371/90119, Political Situation in Egypt, 1951.

Revolusi Julai 1952 dan Ikhwan al-Muslimin

Jawatan Murshid al-Am Ikhwan al-Muslimin tidak terus diisi selepas kematian Hasan al-Banna. Hal ini kerana kepimpinan gerakan tersebut diletakkan di bawah pengendalian bersama oleh beberapa orang pemimpin Ikhwan al-Muslimin yang terdiri daripada Abdul Rahman al-Banna (adik Hasan al-Banna), Salah Ashmawi dan Ahmad Hasan al-Baquri. Dalam mesyuarat Majlis Syura yang diadakan pada bulan Oktober 1951, keputusan diambil untuk melantik Hasan al-Hudaybi, bekas seorang hakim menjadi Murshid al-Am Ikhwan al-Muslimin yang baru. Perlantikan beliau dibuat atas perhitungan latar belakang perundangan yang dimilikinya yang akan membantu menyelesaikan kes mahkamah yang sedang dihadapi oleh Ikhwan al-Muslimin berikutan pembubarannya. Hasan al-Hudaybi juga seorang yang bersikap sederhana, tenang dan lemah-lembut, sekali gus memudahkan usaha menyatukan pelbagai kumpulan yang terdapat di dalam gerakan tersebut. Di samping itu, perhubungan beliau dengan istana diharap akan dapat membantu mengendurkan tekanan yang sedang dihadapi oleh Ikhwan al-Muslimin.

Namun begitu, perlantikan Hasan al-Hudaybi tidak dipersetujui oleh beberapa anggota Majlis Syura, seterusnya mencetuskan perpecahan dalam kalangan pucuk pimpinan gerakan tersebut. Faktor yang menyebabkan beliau tidak dianggap sebagai calon terbaik oleh beberapa kalangan pimpinan ialah kerana beliau dikira masih baru di dalam Ikhwan al-Muslimin dan bukan dalam kalangan pengasas gerakan tersebut. Faktor personaliti dan hubungan beliau dengan istana juga merupakan alasan kenapa pemilihan beliau itu tidak direstui sepenuhnya. Dari segi personaliti, terdapat perbezaan yang jauh antara Hasan al-Hudaybi dengan Hasan al-Banna. Hasan al-Hudaybi berasal dari keluarga yang agak berada, dan beliau bukanlah seorang orator seperti Hasan al-Banna. Perbezaan yang berlaku dalam kalangan pucuk pimpinan ini terus berlanjutan dan memberikan kesan negatif kepada gerakan tersebut.

Ketika rampasan kuasa bagi menggulingkan Raja Farouk dilancarkan oleh *Free Officers* pada 23 Julai 1952, Ikhwan al-Muslimin tidak terlibat secara langsung dalam usaha tersebut. Sebaliknya seluruh usaha itu dilakukan oleh sekumpulan pegawai tentera yang menggelarkan diri mereka sebagai *Free Officers*.²¹ Namun begitu, kejayaan cemerlang dan sokongan rakyat terhadap *Free Officers* ini banyak disumbangkan oleh Ikhwan al-Muslimin, terutamanya ke arah menyemarakkan perasaan benci terhadap pemerintahan Raja Farouk yang lemah dan berada di bawah telunjuk British. Disebabkan gerakan *Free Officers* hanyalah sebuah pakatan tentera dengan hubungan yang longgar dan spontan, mereka tidak mempunyai rangka perjuangan yang tersusun seperti Ikhwan al-Muslimin. Ini menyebabkan mereka kurang yakin dengan kemampuan mereka sendiri serta tidak begitu pasti apa yang patut dilakukan seterusnya, terutamanya di peringkat awal setelah berjaya merampas kuasa.

Pada peringkat awal, *Free Officers* menggunakan slogan popular bagi mendapatkan sokongan rakyat terhadap rejim yang baru dibentuk. Untuk itu, *Free Officers* melaungkan hasrat mereka untuk mewujudkan keadilan sosial, kemajuan ekonomi, pembebasan daripada belenggu imperialisme dan feudalisme serta mengembalikan kedaulatan rakyat sebagai slogan perjuangan.²² Menyedari hakikat Ikhwan al-Muslimin mempunyai pengaruh yang besar dalam kalangan rakyat serta jentera organisasinya yang lebih tersusun, *Free Officers* cuba sedaya upaya mewujudkan kerjasama dan persefahaman dengan gerakan tersebut terutama di peringkat awal.

Bagi mengukuhkan hubungan dengan Ikhwan al-Muslimin, *Free Officers* telah memenuhi tuntutan yang dibuat oleh gerakan tersebut. Hal ini termasuklah memenuhi tuntutan mereka supaya dibuka kembali kes pembunuhan Hasan al-Banna, membebaskan anggota yang dipenjarakan, pembubaran Pasukan Polis Rahsia dan perlantikan Kolonel Rashad Muhanna, seorang penyokong Ikhwan al-Muslimin sebagai salah seorang menteri kabinet dalam kerajaan sementara. Ikhwan al-Muslimin memperlihatkan sikap berpuas hati dengan sikap yang ditunjukkan oleh *Free Officers* itu dan memberikan sokongan terhadap rejim yang baru dibentuk.²³ Pengiktirafan yang diberikan oleh Ikhwan al-Muslimin amat penting kerana membolehkan *Free Officers* membuat perancangan selanjutnya untuk mendominasi politik Mesir. Walaupun mempunyai pengaruh dan kekuatan, tetapi Ikhwan al-Muslimin tidak menggunakan kesempatan yang ada apabila sampai masanya menyebabkan kesempatan tersebut diambil oleh pihak lain.

²¹ Asal-usul sebenar gerakan *Free Officers* (*al-Dubbat al-Ahwar*) agak sukar untuk dipastikan. Mereka dikatakan terdiri daripada sekumpulan pegawai muda dalam angkatan tentera Mesir yang mempunyai pelbagai latar belakang sosial dan status ekonomi. Perjuangan mereka tidak berlandaskan kepada sebarang ideologi politik. Jumlah keanggotaan *Free Officers* dianggarkan seramai 50 orang. Lihat Nihal H. Rizvi (1981), "Political Organization of a Revolutionary Regime: The Case of Egypt," *Hamdard Islamicus*, Vol. 4, No. 4, h. 54-56.

²² *Ibid.*, h. 54.

²³ Richard P. Mitchell (1993), *The Society of the Muslim Brothers*, h. 106.

Konflik Ikhwan al-Muslimin dengan *Free Officers*

Ikhwan al-Muslimin sebagai sebuah organisasi yang paling berpengaruh dan memainkan peranan tidak langsung di dalam menjayakan Revolusi 1952, mereka merasakan bahawa mereka sepatutnya diberi peranan penting di bawah rejim yang baru dibentuk. Walaupun *Free Officers* menunjukkan sikap baik-baik dengan Ikhwan al-Muslimin, tetapi ini bukan bermakna mereka bercadang untuk berkongsi kuasa dengan gerakan tersebut.

Kurang dua bulan selepas revolusi tersebut, perbezaan pendapat mula tercetus antara *Free Officers* dengan Ikhwan al-Muslimin. Perbezaan yang mula-mula tercetus berhubung dengan rancangan reformasi tanah, projek pertama rejim revolusi. Ikhwan al-Muslimin menyuarakan pandangan tidak bersetuju dengan keluasan 200 *feddan*²⁴ tanah yang boleh dimiliki secara individu yang diputuskan oleh *Free Officers*, tetapi sebaliknya mahukan keluasan tersebut dinaikkan menjadi 500 *feddan*. Bantahan Ikhwan al-Muslimin itu dianggap oleh *Free Officers* sebagai satu bentuk penentangan dan penghalang kepada penerusan revolusi. Bagi mereka, kejayaan rancangan reformasi tanah ini penting bagi menaikkan imej mereka, serta meluaskan pengaruh mereka dalam kalangan petani yang selama ini dieksploitasi oleh tuan-tuan tanah.

Pada masa yang sama, hubungan antara *Free Officers* dan Ikhwan al-Muslimin mula menjadi renggang dalam proses pembentukan kabinet pertama di bawah rejim revolusi akibat perletakan jawatan kabinet Ali Maher. Atas kehendak Gamal Abdel Nasser, walaupun tidak dipersetujui oleh Mohamed Neguib, Ikhwan al-Muslimin dipelawa mengemukakan tiga calon untuk menganggotai kabinet tersebut.²⁵ Untuk memenuhi pelawaan tersebut, Hasan al-Hudaybi selaku Murshid al-Am Ikhwan al-Muslimin memilih tiga orang pemimpin utama gerakan tersebut yang terdiri dari Syekh Hasan al-Baquri, Hasan al-Ashmawi dan Munir al-Dalla. *Free Officers* sebaliknya menolak pemilihan Hasan al-Ashmawi dan Munir al-Dalla dan cuma menerima Hasan al-Baquri untuk menyertai kabinet tersebut. Namun begitu, keputusan tersebut tidak dapat diterima oleh Ikhwan al-Muslimin, dan Majlis Syura memutuskan supaya pelawaan menyertai kabinet ini ditolak.

Namun begitu, Hasan al-Baquri yang sebelum ini diketepikan dalam pemilihan Murshid al-Am Ikhwan al-Muslimin telah mengambil keputusan untuk menyertai kabinet Mohamed Neguib dan dilantik menjadi Menteri Wakaf. Tindakannya yang tidak mengendahkan keputusan Majlis Syura ini menyebabkan beliau dipecat. Penyingkiran Hasan al-Baquri, seorang pemimpin yang pernah disebut bakal memimpin Ikhwan al-Muslimin selepas kematian Hasan al-Banna menyebabkan berlakunya keretakan dalam gerakan tersebut. Lanjutan daripada itu, Majlis Revolusi berjaya mengeksploitasi perasaan tidak puas hati yang wujud dalam Ikhwan al-Muslimin untuk melemahkan gerakan tersebut. Bagi mereka, perlantikan Hasan al-Baquri menganggotai kabinet tidak akan menukar dasar pemerintahan. Ini adalah kerana beliau hanya diberi jawatan yang tidak penting. Bagi Ikhwan al-Muslimin pula, mereka melihat peristiwa tersebut telah meninggalkan kesan buruk terutama di saat mereka sedang bersaing dengan *Free Officers* untuk meluaskan pengaruh politiknya. Sebagai langkah membersihkan pengaruh Ikhwan al-Muslimin dalam Majlis Revolusi, orang harapan Ikhwan al-Muslimin iaitu Rashad Muhanna telah digugurkan daripada menganggotai majlis tersebut pada 14 Oktober 1952. Pengguguran beliau dibuat setelah beliau lantang bersuara supaya Perlembagaan Islam dilaksanakan di Mesir.²⁶

Perlembagaan lama Mesir kemudian telah dimansuhkan pada 10 Disember 1952. Sebagai gantinya, sebuah majlis yang dianggotai oleh 100 orang telah dibentuk. Pada 16 Januari 1953, pengisytiharan dibuat bahawa semua parti politik diharamkan. Ikhwan al-Muslimin juga sepatutnya dibubarkan oleh pengisytiharan ini, tetapi disebabkan oleh bantahan yang dibuat oleh Hasan al-Hudaybi, gerakan tersebut telah diberi pengecualian. Kelonggaran sikap yang ditunjukkan oleh *Free Officers* ini disebabkan mereka merasakan belum sampai masanya untuk bertelagah dengan Ikhwan al-Muslimin. Lagipun gerakan tersebut masih mempunyai pengaruh yang kuat dalam kalangan rakyat walaupun terdapatnya perpecahan dalam pucuk pimpinan.

Sempena perayaan enam bulan kejayaan revolusi yang disambut pada 23 Januari 1953, rejim tentera telah menubuhkan *Liberation Rally (Hay'at al-Tahrir)* atau Perhimpunan Pembebasan. Penubuhan Perhimpunan Pembebasan bertujuan untuk mengukuhkan kedudukan rejim tentera dan mengisi kekosongan berikutan

²⁴ *Feddan* merupakan unit tanah yang digunakan secara meluas di Mesir. Secara umumnya, 1 *feddan* menyamai 1.038 ekar. Lihat Halim Barakat (1930), *The Arab World: Society, Culture, and State*, California: University of California Press, h. 314.

²⁵ Richard P. Mitchell (1993), *The Society of the Muslim Brothers*, h. 107.

²⁶ *Ibid.*, h. 109. Sebaik sahaja dipecat, Kolonel Rashad Muhanna telah ditangkap, dibebaskan dan ditangkap semula pada bulan Januari 1953. Beliau dibicarakan atas tuduhan cuba menubuhkan negara Islam dan dijatuhkan hukuman penjara seumur hidup. Lihat R. Hrair Dekmejian (1971), *Egypt Under Nasser: A Study in Political Dynamics*, Albany, New York: State University of New York Press, h. 26.

pengharaman parti-parti politik. Perhimpunan Pembebasan ini akan memainkan peranan sebagai penghubung antara Majlis Revolusi dengan rakyat bagi menggembelng tenaga mereka agar menyokong revolusi. Penubuhannya juga membolehkan pengaruh *Free Officers* diperluas ke seluruh negara. Ikhwan al-Muslimin sebaliknya menentang penubuhan Perhimpunan Pembebasan kerana pertubuhan tersebut bukan sahaja akan menjadi jentera propaganda Majlis Revolusi, tetapi juga akan menggugat pengaruh Ikhwan al-Muslimin dalam kalangan rakyat.²⁷

Pembentukan Perhimpunan Pembebasan oleh *Free Officers* jelas memperlihatkan usaha mereka untuk memonopoli kuasa politik Mesir. Dengan perpecahan yang berlaku dalam Ikhwan al-Muslimin serta kegiatan parti politik dan pertubuhan lain berjaya dilumpuhkan, kedudukan mereka setelah setahun berkuasa menjadi semakin mantap. Perhimpunan Pembebasan yang ditubuhkan berjaya memainkan peranan untuk mengukuhkan sokongan rakyat terhadap mereka. *Free Officers* kini kian mampu menandingi pengaruh yang sebelum ini dimiliki oleh Ikhwan Muslimin. Kekuatan yang mereka perolehi ini bukan sahaja terletak pada perancangan rapi yang dilakukan, tetapi juga pada kelemahan yang dialami oleh penentang-penentangannya.²⁸

Dengan kedudukan *Free Officers* yang semakin kukuh setelah melakukan pelbagai usaha yang berkesan, Ikhwan al-Muslimin pula dilanda krisis demi krisis. Selepas peristiwa penyingkiran Hasan al-Baquri, Ikhwan al-Muslimin sekali lagi dilanda krisis serius berikutan pemilihan pucuk pimpinan pada 8 Oktober 1953. Dalam pemilihan tersebut, Hasan al-Hudaybi telah disahkan sebagai Murshid al-Am Ikhwan al-Muslimin dan Abdul Hakim Abidin dilantik menjadi Setiausaha. Walau bagaimanapun dalam pemilihan yang diadakan itu, kumpulan yang tidak sehaluan dengan Hasan al-Hudaybi yang dipimpin oleh Salah Mustapha Ashmawi, bekas Timbalan Murshid al-Am Ikhwan al-Muslimin dan pengarang lidah rasmi gerakan tersebut iaitu *Majalah al-Dakwah* telah diketepikan. Mereka yang terkeluar daripada Majlis Syura ini kemudiannya bertindak merampas ibu pejabat Ikhwan al-Muslimin bagi memaksa perletakan jawatan Hasan al-Hudaybi.²⁹

Walaupun bagaimanapun, percubaan tersebut berjaya ditumpaskan. Hasan al-Hudaybi pula terus kekal sebagai pemimpin Ikhwan al-Muslimin. Akibatnya, pertentangan dalam kalangan pucuk pimpinan menjadi semakin ketara. Dalam mesyuarat Majlis Syura yang diadakan pada 9 Disember 1953, keputusan diambil untuk memecat keanggotaan Salah Ashmawi, Muhammad al-Ghazali, Sayyid Sabiq dan Abdul Aziz Jalah dari Ikhwan al-Muslimin kerana tindakan yang dianggap mencemarkan organisasi tersebut. Pemecatan tokoh penting Ikhwan al-Muslimin ini menyebabkan perpaduan dalam kalangan anggota gerakan tersebut menjadi semakin goncang. Gamal Abdel Nasser menyedari kewujudan krisis dalaman yang sedang melanda Ikhwan al-Muslimin ini. Kecenderungan kedua-dua kumpulan yang bertelagah mendapatkan kerjasama beliau bagi menyelesaikan masalah mereka membolehkannya berperanan dalam krisis yang berlaku. Namun begitu, Nasser lebih memperlihatkan sikap memihak kepada golongan yang menentang Hasan al-Hudaybi.

Dalam perbincangan beliau dengan *Oriental Councillor* Kedutaan British di Kaherah iaitu Trefor Evans, Nasser dengan bangga merendah-rendahkan kepimpinan Ikhwan al-Muslimin di bawah Hasan al-Hudaybi. Pada pendapatnya, percakapan yang berlaku dalam kalangan pemimpin gerakan tersebut menyebabkan tugas utama Hasan al-Hudaybi cumalah untuk mengekalkan kedudukannya daripada digulingkan.³⁰ Nasser juga menegaskan bahawa beliau sentiasa memberikan perhatian terhadap perkembangan yang berlaku dalam Ikhwan al-Muslimin dan sejak beberapa lama telah membuat hubungan dengan kumpulan anti-Hudaybi. Nasser yakin bahawa Hasan al-Hudaybi tidak menyedari apa yang beliau lakukan untuk melaga-lagakan pemimpin gerakan tersebut.³¹

Konflik antara Majlis Revolusi dan Ikhwan al-Muslimin terus meruncing dari sehari ke sehari. Ini bukan sahaja melibatkan pucuk pimpinan kedua-dua organisasi tersebut, tetapi melibatkan juga penyokong masing-masing. Pada 12 Januari 1954, pergaduhan meletus di Universiti Kaherah, di Giza di antara pelajar yang menyokong Ikhwan al-Muslimin dengan penyokong Perhimpunan Pembebasan. Pergaduhan ini meletus dalam satu rapat umum anjuran Ikhwan al-Muslimin bagi mengingatkan mereka yang syahid dalam pertempuran di Suez. Pemandato utama yang diundang berucap dalam rapat umum tersebut ialah Nawab Safawi, Ketua Fedaiyyin Iran.³² Peristiwa pergaduhan tersebut telah dijadikan alasan oleh Majlis Revolusi untuk mengharamkan Ikhwan al-

²⁷ Adnan A. Musallam (2005), *From Secularism to Jihad: Sayyid Qutb and the Foundations of Radical Islamism*, Westport, CT: Praeger Publishers, h. 138.

²⁸ FO371/102795, Defence Negotiations between Egypt and UK, 30 Disember 1953.

²⁹ Lihat Barbara H.E. Zollner (2009), *The Muslim Brotherhood: Hasan al-Hudaybi and Ideology*, London: Routledge, h. 32.

³⁰ FO371/102795, Defence Negotiations between Egypt and UK, 30 Disember 1953.

³¹ FO371/102763, Negotiations between Egypt and UK: Reaction to Egyptian Demands for Evacuation of the Canal Zone, 27 Februari 1953.

³² FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 13 Januari 1954. Lihat juga Anouar Abdel Malek (1968), *Egypt Military Society*, New York: Random House, h. 94.

Muslimin. Serentak dengan itu, pemimpin dan penyokong Ikhwan al-Muslimin telah ditangkap. Menurut kenyataan yang dibuat oleh Menteri Dalam Negeri, Kolonel Zakaria Mohieddin, 450 orang anggota Ikhwan al-Muslimin telah ditangkap termasuk semua anggota Majlis Syura dan Murshid al-Am, Hasan al-Hudaybi dalam operasi yang dilancarkan. Gerakan menangkap pemimpin dan penyokong Ikhwan al-Muslimin ini memperlihatkan satu perancangan yang rapi sehingga berjaya mengelakkan berlakunya sebarang tindak balas berkesan daripada gerakan tersebut. Kejayaan yang dicapai oleh pihak polis ini diyakini adalah hasil kejayaan rejim tentera menyusupkan ejen-ejen mereka ke dalam Ikhwan al-Muslimin.³³

Ketika pengumuman rasmi yang dibuat berikutan pengharaman Ikhwan al-Muslimin, rejim tentera mengumumkan bahawa gerakan tersebut terlepas daripada pembubaran pada peringkat awal kerana mereka mengisytiharkan bahawa diri mereka tidak mempunyai cita-cita politik dan akan menyokong hasrat yang diperjuangkan oleh revolusi.³⁴ Namun begitu, gerakan tersebut sebaliknya mengumpulkan tenaga bagi menggulingkan pemerintah.³⁵ Antara tuduhan yang dilemparkan ke atas Ikhwan al-Muslimin termasuklah membelot kepada negara dengan mengadakan perundingan sulit dengan pihak British ketika Majlis Revolusi sedang mengadakan perundingan rasmi. Tuduhan-tuduhan yang lain termasuklah cuba mempengaruhi serta meningkatkan keanggotaannya di dalam pasukan polis dan tentera. Sejumlah senjata serta bahan letupan yang didakwa ditemui di rumah Hasan al-Ashmawi dijadikan alasan bahawa gerakan tersebut sedang merancang satu tindakan bersenjata dan mencetuskan huru-hara. Walaupun begitu, senjata dan bahan letupan ini dipercayai bukan bertujuan menentang rejim tentera, tetapi bagi menentang British di Zon Terusan Suez.³⁶

Kekuatan dan kemampuan Majlis Revolusi kini sudah teruji hasil kejayaan Majlis Revolusi bertindak ke atas Ikhwan al-Muslimin. Walaupun Majlis Revolusi berpuas hati dengan hakikat itu, tetapi mereka masih khuatir untuk mengambil tindakan yang lebih drastik. Hal ini kerana kemungkinan anggota Ikhwan al-Muslimin yang tidak berjaya diberkas akan bertindak ganas dengan melakukan pembunuhan politik seperti apa yang pernah berlaku kepada Nukrasyi Pasha.³⁷ Walau bagaimanapun, Majlis Revolusi yakin mereka telah berjaya melumpuhkan semua penentang politik mereka. Mereka juga telah berjaya melumpuhkan Parti Wafd, iaitu parti yang pernah mendominasi politik Mesir; Parti Komunis; Kesatuan Sekerja; dan pertubuhan-pertubuhan profesional yang lain. Masanya akan tiba untuk mereka menghapuskan musuh politik mereka yang terakhir, iaitu Ikhwan al-Muslimin. Langkah-langkah sewajarnya ke arah itu telahpun dilakukan. Kini mereka tidak perlu lagi mengharapkan sokongan daripada gerakan tersebut kerana mereka telah pun membina kekuatan sendiri melalui sokongan yang diberikan oleh Perhimpunan Pembebasan dan Pengawal Kebangsaan, selain pasukan polis dan tentera.

Majlis Revolusi bertindak terhadap Ikhwan al-Muslimin ketika rundingan British-Mesir sedang dijalankan. Rundingan tersebut amat penting amat penting bagi rejim tentera kerana akan menentukan masa depan kehadiran British di negara tersebut. Hal ini kerana berjaya atau gagal rundingan tersebut akan menentukan masa depan pemerintahan rejim tentera di Mesir. Penentangan terutamanya daripada organisasi seperti Ikhwan al-Muslimin sudah pasti akan membawa padah kepada perundingan tersebut. Rejim tentera tidak bersedia membenarkan Ikhwan al-Muslimin menjadi penghalang kepada kewujudan mereka. Jeneral Mohamed Neguib juga jelas menunjukkan sikap merestui tindakan penindasan terhadap Ikhwan al-Muslimin. Malahan beliau merasakan tindakan tersebut sepatutnya diambil sejak awal-awal lagi.³⁸ Sikap kurang senangnya terhadap Ikhwan al-Muslimin bukanlah suatu yang baru, kerana beliau telah menunjukkan sikap prasangka terhadap gerakan tersebut sejak kejayaan *Free Officers* merampas kuasa lagi. Tetapi sikap beliau terhadap Ikhwan al-Muslimin ini berubah apabila beliau menyedari kedudukannya di dalam Majlis Revolusi semakin merosot. Pada masa yang sama, Jeneral Mohamed Neguib menyedari bahawa penyertaannya dalam kumpulan pegawai tentera yang merampas kuasa dibuat di saat-saat akhir sebelum dilancarkan. Beliau dipelawa menyertai gerakan merampas kuasa ini memandangkan kedudukannya dalam angkatan tentera ketika itu. Penyertaannya adalah bagi memastikan rampasan kuasa tersebut berjalan dengan lancar. Walaupun beliau dilantik memegang jawatan Presiden Mesir selepas rampasan kuasa, tetapi beliau tidak dapat menandingi pengaruh yang dimiliki

³³ FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 13 Januari 1954.

³⁴ Untuk teks penuh pengisytiharan pembubaran Ikhwan al-Muslimin lihat, "Document Dissolution of the Muslim Brotherhood, Statement of the Council of the Revolutionary Command," *The Middle Eastern Affairs*, Vol. V. No. 3, March 1954. Teks ini turut disiarkan dalam *Egyptian Gazette*, 15 Januari 1954.

³⁵ FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 13 Januari 1954.

³⁶ FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 5 Januari 1954.

³⁷ FO371/108312, Fortnightly Political Summaries for Egypt and Sudan Covering Period December 1953 to December 1954, 28 Februari 1954.

³⁸ FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 25 Januari 1954.

oleh Gamal Abdel Nasser. Sebenarnya sejak dari awal lagi, Neguib memang sudah diramal akan disingkirkan oleh kumpulan yang merampas kuasa.³⁹ Apabila menyedari kedudukannya terus tersisih, perhubungan beliau dengan Nasser menjadi renggang.

Konflik Neguib-Nasser menyebabkan Neguib menunjukkan sikap kritikal terhadap dasar yang dijalankan oleh Nasser. Apabila Majlis Revolusi bertindak mengharam dan menangkap anggota Ikhwan al-Muslimin, Neguib menggunakan kesempatan ini untuk mengkritik Nasser dan Majlis Revolusi secara terbuka.⁴⁰ Sikap yang ditunjukkan oleh Neguib ini menjadikan beliau popular dalam kalangan penyokong Ikhwan al-Muslimin yang menganggap perjuangan mereka kini mendapat simpati dari seorang pemimpin negara. Sebenarnya hakikat sebenar sokongan Neguib ini masih boleh dipertikaikan lebih-lebih lagi kerana sokongan beliau dibuat ketika pengaruhnya sedang mengalami kemerosotan. Faktor sokongan Ikhwan al-Muslimin terhadap kepimpinan Neguib juga menjadi sebab utama yang membawa kepada penindasan Nasser terhadap Ikhwan al-Muslimin kerana bagi Nasser, sokongan gerakan tersebut terdapat Neguib yang merupakan musuh beliau adalah sesuatu yang sukar diterima dan dimaafkan.⁴¹

Perselisihan antara Jeneral Mohamed Neguib dengan Gamal Abdel Nasser menjadi perbalahan terbuka apabila Neguib yang ingin menguji sejauhmana pengaruhnya dalam kalangan rakyat mengambil keputusan mengejut dengan mengumumkan perletakan jawatannya di dalam Majlis Revolusi dan sebagai Presiden Mesir pada 23 Februari 1954. Perletakan jawatan Neguib dan sikap yang beliau tunjukkan terhadap Ikhwan al-Muslimin digunakan oleh gerakan tersebut bagi memperbaiki kedudukannya dalam politik Mesir setelah diharamkan. Gabungan isu perletakan jawatan Neguib dan penindasan yang dialaminya, membolehkan Ikhwan al-Muslimin memobilisasikan sokongan rakyat terutama di Kaherah dan bandar-bandar besar yang lain dengan menuntut supaya Neguib dikekalkan sebagai Presiden Mesir. Sokongan popular yang diterima oleh Neguib menyebabkan Majlis Revolusi terpaksa menarik balik penerimaan perletakan jawatan beliau. General Neguib kembali memegang jawatan Presiden Mesir pada 26 Februari 1954, iaitu 48 jam selepas perletakan jawatannya.

Jeneral Mohamed Neguib kemudian muncul di khalayak ramai di Medan Republik untuk menyampaikan ucapannya pada pagi 28 Februari 1954. Dalam ucapannya, beliau berjanji akan mempercepat proses pemerintahan demokrasi dengan menyegerakan pembentukan Majlis Perwakilan. Dalam perhimpunan yang dihadiri oleh ramai penyokong Ikhwan al-Muslimin ini, slogan-slogan anti-Majlis Revolusi telah dilaungkan. Timbalan Murshid al-Am Ikhwan al-Muslimin, Abdul Kader Audah turut menyampaikan ucapannya dengan menyatakan sokongan gerakan tersebut kepada Neguib dan menyelar tindak-tanduk Majlis Revolusi. Sementara itu, kekacauan meletus antara pelajar yang menyokong Ikhwan al-Muslimin dengan polis dalam perjalanan mereka menuju ke Medan Republik untuk menyertai rapat umum tersebut. Berikutan kekacauan yang meletus itu, Universiti Kaherah terpaksa ditutup selama seminggu.⁴²

Tindakan Jeneral Mohamed Neguib yang meletakkan jawatan dan menarik semula perletakan jawatan beliau merupakan satu hakikat yang sukar untuk diterima oleh Gamal Abdel Nasser dan Majlis Revolusi. Walaupun Neguib dilantik semula menjadi Presiden Mesir, namun beliau terus dipencilkan. Kerjasama antara beliau dengan Nasser dan Majlis Revolusi juga tidak wujud. Perkembangan yang berlaku menyebabkan Majlis Revolusi berada dalam dilema untuk menentukan apa yang seharusnya dilakukan ke atas pemimpin dan penyokong Ikhwan al-Muslimin yang sedang ditahan.

Majlis Revolusi khuatir jika mereka dijatuhkan hukuman berat seperti hukuman gantung sampai mati sebagaimana yang pernah dilakukan oleh Stalin terhadap penentang-penentangannya, kemungkinan besar anggotanya yang masih bebas akan bertindak balas dengan melakukan pembunuhan politik.⁴³ Jika mereka dibebaskan tanpa syarat, maka tindakan tersebut akan menjejaskan kewibawaan mereka dan rakyat pula akan menganggap Majlis Revolusi sebagai lemah. Dilema yang dihadapi oleh Majlis Revolusi ini diburukkan lagi dengan timbulnya kecurigaan terhadap ketaatan Pengawal Kebangsaan yang sepatutnya menyokong mereka, tetapi disyaki telah dipengaruhi oleh perjuangan Ikhwan al-Muslimin.

³⁹ FO141/1454, Egypt: Political Situation, 1 Ogos 1954.

⁴⁰ Jean Lacouture dan Simon Lacouture (1958), *Egypt in Transition*, London: Methuan & Co. Ltd., h. 182.

⁴¹ Ivesa Lubben (2016), "The Economic Ideology of Hasan al-Banna and the Egyptian Muslim Brotherhood", dalam Hartmut Elsenhans et al. (ed.), *The Transformation of Politicised Religion: From Zealots Into Leaders*, New York: Routledge, h. 87.

⁴² FO371/108312, Fortnightly Political Summaries for Egypt and Sudan Covering Period December 1953 to December 1954, 11 Mac 1954.

⁴³ FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 15 Februari 1954.

Imej Majlis Revolusi di Dunia Arab turut terjejas akibat tindakan tersebut. Mengambil kesempatan daripada permintaan Raja Arab Saudi, Raja Saud yang melawat Mesir pada bulan Mac 1954, Majlis Revolusi memutuskan untuk memberi pengampunan kepada Ikhwan al-Muslimin. Anggota-anggotanya yang sedang ditahan kemudian dibebaskan dan gerakan tersebut dibenarkan untuk bergiat kembali. Walaupun perhitungan politik yang menyokong Neguib telah memberikan kemenangan moral kepada Ikhwan al-Muslimin dan menyelamatkan gerakan tersebut untuk beberapa ketika, tetapi tindakan tersebut tidak berjaya memporak-perandakan Majlis Revolusi sepenuhnya. Hal ini kerana pengaruh Nasser tetap utuh dalam Majlis Revolusi. Di samping itu, tindakan tersebut juga mendorong Majlis Revolusi agar lebih berhati-hati dalam perancangannya untuk menghapuskan musuh-musuh politiknya. Untuk sementara waktu, Majlis Revolusi cuba menggerakkan sepenuhnya kegiatan Perhimpunan Pembebasan dengan memperbanyak program sosial dan agama bagi mengambil alih peranan yang selama ini dimainkan oleh Ikhwan al-Muslimin.

Hubungan antara Ikhwan al-Muslimin dengan Majlis Revolusi menjadi semakin meruncing berikutan termeterainya persetujuan pada 27 Julai 1954 yang membawa kepada pengunduran tentera British dari Terusan Suez dalam tempoh 20 bulan.⁴⁴ Namun begitu, persetujuan ini juga memperuntukkan bahawa tentera British boleh kembali semula ke Mesir jika Turki atau mana-mana negara Arab diserang. Persetujuan yang diusahakan secara individu oleh Nasser ini dikecam hebat oleh Ikhwan al-Muslimin sebagai tidak tegas dan merugikan. Dalam satu surat terbuka yang ditulis oleh Hasan al-Hudaybi bertarikh 2 Ogos 1954, beliau menyifatkan persetujuan ini sebagai satu pembelotan. Beliau kemudiannya melawat negara-negara Arab dan mengutuk langkah yang diambil oleh Gamal Abdel Nasser ini, dan pada waktu yang sama memuji Jeneral Mohamed Neguib sebagai penyelamat negara. Pada masa yang sama, Gamal Abdel Nasser mengambil tindakan balas dengan mengecam Ikhwan al-Muslimin yang disifatkannya sama seperti komunis dan Zionis, iaitu musuh kepada kemajuan Mesir. Perundingan British-Mesir berhubung dengan masa depan Terusan Suez akhirnya membawa kepada termeterainya perjanjian pada 19 Oktober 1954 antara Nasser dengan Anthony Nutting, wakil Pejabat Luar British bahawa tentera British akan dikeluarkan dari Mesir dalam tempoh 20 bulan dengan syarat tentera British boleh kembali semula jika kuasa luar menyerang negara Liga Arab atau Turki.⁴⁵ Di pihak British, walaupun perjanjian ini membawa kepada pengunduran tenteranya dari Terusan Suez, tetapi British masih berpuas hati dengan peruntukan yang membolehkan mereka kembali jika keadaan memaksa. Bagi pihak Majlis Revolusi pula, perkara terpenting ialah mereka mesti berusaha supaya British keluar dari bumi Mesir bagi menaikkan imej mereka walaupun terpaksa bertolak-ansur dalam beberapa perkara.

Hakikatnya, tentangan keras terhadap persetujuan British-Mesir ini telah disuarakan oleh Ikhwan al-Muslimin. Gerakan tersebut berpendapat bahawa tidak ada tolak-ansur dalam penyelesaian di Terusan Suez melainkan dengan mengisytiharkan jihad terhadap pendudukan British. Ketika memulakan perundingan untuk pengundurannya dari Terusan Suez pihak British telah turut mengatur beberapa kali pertemuan sulit dengan beberapa orang pemimpin Ikhwan Muslimin. Pertemuan yang sepatutnya sulit itu secara rahsia telah didedahkan kepada Nasser. Dalam perbincangannya dengan Nasser yang telah diadakan pada 16 Januari 1954, Trefor Evans membocorkan rahsia pertemuan yang dibuatnya dengan beberapa orang pemimpin Ikhwan al-Muslimin itu. Dalam pertemuannya dengan Nasser ini juga, beliau turut membincangkan perkara berkaitan dengan Ikhwan al-Muslimin dan menyampaikan maklumat-maklumat yang dimiliki oleh British tentang gerakan tersebut. Nasser sendiri tidak menafikan terdapatnya pertemuan dan perbincangan sedemikian apabila isu ini ditimbulkan.⁴⁶

Hubungan yang tegang antara Ikhwan al-Muslimin dan rejim yang berkuasa sampai ke kemuncaknya sepanjang bulan September dan Oktober 1954. Pada penghujung bulan Ogos 1954, pergaduhan meletus selepas sembahyang Jumaat di Rawda antara polis dengan penyokong Ikhwan al-Muslimin. Pada 10 September 1954, peristiwa yang sama berlaku di Tanta dan Mit Ghamar, iaitu kubu kuat Ikhwan al-Muslimin. Pada 23 September 1954, Majlis Revolusi mengisytiharkan pelucutan kewarganegaraan enam orang rakyat Mesir atas tuduhan merosakkan imej negara dan mengancam hubungan Mesir dengan negara jirannya. Lima daripada mereka iaitu Said Ramadan, Abdul Hakim Abidin, Saad al-Din al-Walili, Muhammad Najib Juwayfil, Kamil Ismail dan Mahmud Abu al-Fath adalah pemimpin Ikhwan al-Muslimin. Ketika itu, mereka berada di Damsyik, Syria. Manakala rakyat Mesir keenam yang dilucutkan kewarganegaraannya ialah Mahmud Abu Fath, bekas tuan punya akhbar harian Parti Wafd yang ketika itu berada di Switzerland.⁴⁷

⁴⁴ Selwyn Lloyd (1978), *Suez 1956: A Personal Account*, London: Book Club Associates, h. 24.

⁴⁵ Derek Hopwood (1993), *Egypt: Politics and Society, 1945-1990*, London, Routledge, h. 41.

⁴⁶ FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 15 Februari 1954.

⁴⁷ Ibid.

Suasana tegang tersebut mencapai kemuncak pada 26 Oktober 1954. Pada hari tersebut iaitu kira-kira pukul 7.55 petang, beberapa das tembakan telah dilepaskan ke arah pentas ketika Gamal Abdel Nasser memulakan ucapannya di Iskandariah sempena pengunduran tentera British daripada Zon Terusan Suez. Penembaknya dikatakan merupakan Mahmud Abdul Latiff, seorang anggota Pertubuhan Bersenjata Ikhwan al-Muslimin. Namun begitu, tiada seorang pun yang tercedera disebabkan oleh tembakan tersebut, cuma beberapa buah mentol lampu sahaja yang pecah. Nasser kemudian meneruskan ucapannya dan menonjolkan imejnya sebagai manusia yang mendapat perlindungan Allah SWT daripada angkara "pengkhianat". Peristiwa yang berlaku ini digunakan oleh Nasser untuk mengecam Ikhwan al-Muslimin.

Jika ditinjau secara mendalam terhadap kepada peristiwa percubaan membunuh Gamal Abdel Nasser, terdapat banyak persoalan yang timbul. Sukar untuk ditentukan dengan tepat sama ada peristiwa ini merupakan perancangan terperinci bagi menggulingkan kerajaan tentera seperti yang didakwa oleh Komander Udara, Gamal Salem atau sebagai satu perancangan rapi oleh Nasser sendiri bagi memberikannya peluang kepada beliau untuk menindas Ikhwan al-Muslimin. Dalam konteks ini juga, peranan yang dimainkan oleh British turut menimbulkan persoalan. Hal ini kerana laporan perisikan British menunjukkan mereka telah mempunyai maklumat tentang percubaan bunuh ini beberapa minggu sebelum peristiwa ini terjadi. Percubaan bunuh tersebut kemudian telah digunakan oleh rejim tentera untuk menghapuskan Ikhwan al-Muslimin. Sebelum subuh 27 Oktober 1954, lebih 7,000 penyokong dan pemimpin Ikhwan al-Muslimin telah ditangkap di bawah arahan Menteri Dalam Negeri, Leftenan Kolonel Zakaria Mohieddin serta dibantu oleh polis rahsia dan askar. Tindakan tegas yang diambil jelas menunjukkan bahawa rejim tentera yang berkuasa sememangnya berhasrat untuk menghapuskan semua unsur yang dianggap boleh mengancam mereka.

Majlis Revolusi kemudian mengumumkan pembentukan sebuah tribunal khas pada 1 November 1954 bagi membicarakan kes-kes yang dikategorikan sebagai mengancam keselamatan negara, menentang rejim yang memerintah, pengkhianatan dan kesalahan terhadap prinsip asas revolusi. Anggota tribunal ini terdiri daripada Komander Udara, Gamal Salem sebagai Presiden, manakala Kolonel Anwar Sadat dan Leftenan Kolonel Hussain Shafii sebagai anggota. Jeneral Neguib juga dituduh terlibat di dalam kegiatan yang mengancam keselamatan negara. Akibatnya, kabinet mengambil keputusan memecat beliau dan mengenakan tahanan dalam rumah terhadap beliau pada 14 November 1954. Perbicaraan yang melibatkan pemimpin dan pengikut Ikhwan al-Muslimin ini diberi liputan meluas oleh media yang dikuasai oleh kerajaan. Melalui saluran propaganda ini, Ikhwan al-Muslimin telah dilabel sebagai musuh rakyat sama seperti Parti Wafd, keluarga diraja dan komunis yang telah ditumpaskan.⁴⁸

Perbicaraan terhadap mereka yang ditahan juga dilaporkan telah dilakukan dengan berat sebelah. Ketika perbicaraan dijalankan, dilaporkan berlakunya penyiksaan yang di luar batas kemanusiaan terhadap mereka yang ditahan. Akibatnya, sebahagian besar mereka yang dituduh telah mengaku bersalah. Pembabit Jeneral Mohamed Neguib di dalam perbicaraan ini cumalah bagi mengukuhkan alasan rejim yang berkuasa untuk menyingkirkan beliau. Pada 4 Disember 1954, keputusan perbicaraan telah diumumkan oleh Tribunal Rakyat. Tujuh orang tahanan dijatuhkan hukuman bunuh, tujuh tahanan dipenjarakan seumur hidup, manakala dua tahanan lagi dipenjarakan. Tahanan yang dijatuhkan hukuman mati ialah Mahmud Abdul Latiff, Hasan al-Hudaybi, Yousuf Talaat, Ilindawi Dweir, Ibrahim al-Tayyeb, Abdul Kader Audah dan Mohamad al-Farghali. Tahanan yang dijatuhkan hukuman penjara seumur hidup dengan kerja berat pula ialah Mohamad Khamis Hameida, Salah Abu Rukayek, Munir al-Dalla, Hussein Kamaluddin, Kamal Khalifa, Abdul Aziz Attia dan Abdul Hamid Abul Nasr. Manakala tahanan yang dibebaskan pula ialah al-Bahiyy al-Kholy, Abdul Moess Abdul Sattar dan Abdul Rahman al-Banna. Walau bagaimanapun, hukuman bunuh yang dijatuhkan ke atas Hasan al-Hudaybi telah diringankan menjadi hukuman penjara seumur hidup memandangkan usia beliau yang sudah lanjut.

Sebaik sahaja hukuman telah diumumkan, rejim tentera bertindak segera dengan melaksanakan hukuman gantung walaupun banyak rayuan yang dikemukakan oleh pelbagai pihak supaya hukuman tersebut diringankan. Antara mereka yang menghantar rayuan supaya hukuman bunuh ini diringankan termasuklah daripada kerajaan Syria, Presiden Persekutuan Peguam Iraq, Ahli Parlimen Sudan dan Menteri-Menteri Luar Liga Arab yang bermesyuarat di Kaherah. Di samping itu juga, banyak rayuan dibuat oleh pertubuhan-pertubuhan Islam di seluruh dunia supaya hukuman tersebut diringankan. Hukuman kejam terhadap tahanan oleh rejim tentera menyebabkan ramai pemimpin Ikhwan al-Muslimin yang tidak ditangkap terpaksa melarikan diri dari Mesir. Mereka diberi perlindungan politik oleh beberapa buah negara Arab dan Eropah. Penindasan

⁴⁸ FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 15 Februari 1954.

kejaman yang berlaku pada tahun 1954 ini telah memudarkan dominasi Ikhwan al-Muslimin dalam politik Mesir. Penindasan ini menyebabkan gerakan tersebut terpaksa mengambil masa yang panjang hampir iaitu hampir enam dekad bagi memulihkan semula kedudukan mereka dalam politik.

Kesimpulan

Perkembangan politik Mesir yang berlaku antara tahun 1948 hingga 1954 terbukti sebagai tahap yang menentukan masa depan politik Mesir dan peranan Ikhwan al-Muslimin. Titik peralihan yang terpenting ialah kematian Hasan al-Banna pada tahun 1949. Mungkin jika beliau tidak dibunuh, sejarah Mesir dan Timur Tengah keseluruhannya adalah sama sekali berbeza daripada apa yang dapat dilihat pada hari ini. Walaupun Ikhwan al-Muslimin merupakan sebuah organisasi yang paling berpengaruh di Timur Tengah, tetapi gerakan tersebut tidak berjaya menguasai politik Mesir atau mana-mana negara Arab. Sebaliknya golongan minoriti lain seperti Baath, Alawi, sosialis dan liberal berjaya berbuat demikian dalam tempoh tersebut atau tempoh kemudiannya.

Walaupun Ikhwan al-Muslimin mempunyai anggota yang dikatakan berjumlah dua juta orang berbanding dengan *Free Officers* yang hanya berjumlah lima puluh orang, tetapi gerakan tersebut ditewaskan oleh golongan yang lebih kecil. Satu hakikat yang tidak dapat ditolak ialah pemimpin Ikhwan al-Muslimin selepas kematian Hasan al-Banna yang tidak setanding dengan beliau merupakan antara penyumbang terbesar kepada kegagalan ini. Perebutan dan perpecahan dalam kalangan pucuk pimpinan juga menyebabkan gerakan tersebut menjadi berpuak-puak dan kurang berkesan dalam penglibatan politiknya. Keadaan ini berjaya diambil kesempatan oleh Gamal Abdel Nasser dan rejim tentera untuk melemahkan lagi gerakan tersebut daripada mencapai matlamatnya.

Meskipun Pasukan Bersenjata Ikhwan al-Muslimin yang diasaskan oleh Hasan al-Banna telah menunjukkan prestasi yang baik di Palestin, tetapi penglibatan mereka tidak dapat dibanggakan di Mesir. Pasukan ini yang tidak dapat dikawal sejak Hasan al-Banna masih hidup lagi telah terlibat dalam pelbagai konflik yang membabitkan senjata. Hal ini bukan sahaja menjejaskan imej Ikhwan al-Muslimin dalam kalangan rakyat sebagai sebuah organisasi dakwah, tetapi yang lebih penting lagi mendedahkan organisasi tersebut kepada tindak balas yang kejam. Pendekatan bersenjata tanpa rasional yang jelas akan menyebabkan runtuhnya sesebuah organisasi. Sepanjang penglibatan politiknya, Ikhwan al-Muslimin juga telah membuat beberapa perhitungan politik yang boleh dipertikaikan hikmahnya. Ini termasuklah kepercayaan yang diberikan kepada Jeneral Mohamed Neguib dan menganggap beliau sebagai penyokong yang boleh dijadikan tempat bergantung.

Sedangkan hakikat sebenar sokongan Neguib kepada gerakan tersebut lebih bersifat untuk menjaga kepentingan peribadinya. Lagipun pengaruh beliau dalam Majlis Revolusi tidaklah begitu besar untuk diletakkan satu pengharapan. Ikhwan al-Muslimin juga tidak menggunakan tawar-menawar politik yang berkesan di peringkat awal ketika *Free Officers* masih lemah. Hal ini menyebabkan tuntutan tegas Ikhwan al-Muslimin setelah *Free Officers* mempunyai kedudukan yang kukuh dianggap sebagai mencabar kedudukan dan kewibawaan *Free Officers*. Selain itu, peranan British juga penting dalam proses penindasan Ikhwan al-Muslimin. British yang berhasrat menjaga kepentingannya di Mesir membuat penilaian ke atas kedua-dua belah pihak, iaitu Nasser dan Ikhwan al-Muslimin sebelum memilih salah satu sebagai sekutu yang boleh diajak berunding.

Tindakan British membocorkan pertemuannya dengan Ikhwan al-Muslimin kepada Nasser bertujuan menjatuhkan imej gerakan tersebut di mata rakyat. Maklumat yang dimiliki oleh British terhadap percubaan untuk membunuh Nasser menimbulkan keraguan terhadap peranan mereka dalam peristiwa tersebut. Perundingan dan pertemuan yang diadakan antara British dengan Nasser, jelas menunjukkan wujudnya kerjasama yang erat antara keduanya belah pihak bagi menindas Ikhwan al-Muslimin. Walaupun Nasser tidak memenuhi semua kemahuan British, tetapi beliau jelas memperlihat kesediaan beliau untuk bekerjasama dengan British jika dibandingkan dengan Ikhwan al-Muslimin.

Satu kebenaran yang juga tidak dapat ditolak ialah kewibawaan Nasser di dalam mengendalikan percaturan politiknya di Mesir. Walaupun Nasser bukanlah seorang yang mempunyai latar belakang pendidikan yang tinggi, tetapi imaginasi politiknya agak baik. Beliau bukan sahaja berjaya menyingkirkan kesemua musuh luaran yang boleh menggugat kedudukannya, tetapi juga mereka yang tidak sehaluan dengannya di dalam Majlis Revolusi. Hakikatnya, Ikhwan al-Muslimin telah memberikan sumbangan yang besar kepada kebangkitan Islam bukan sahaja di Mesir, tetapi juga di seluruh Timur Tengah. Anggota dan pemimpin gerakan tersebut juga telah membuktikan sumbangan mereka dengan jiwa dan raga mereka. Namun begitu, secara realiti kejayaan sesebuah

gerakan Islam tidak semata-mata diukur melalui pengorbanan yang telah dicurahkan, tetapi juga dengan kejayaan yang dicapai termasuk kejayaan yang diperolehi di dunia. Hal ini kerana kegagalan gerakan Islam dan kejayaan pihak lain juga perlu diberi penilaian meliputi faktor perancangan, perhitungan politik, dan konflik sesama sendiri yang banyak mempengaruhi kejayaan atau kegagalan sesebuah perjuangan.

Rujukan

Abdul Muta'al al-Kabbari, (1986), *Pembunuhan Hasan al-Banna*, Bandung: Penerbit Pustaka Bandung.

Ansari, Zafar Ishaq, (1961), "Contemporary Islam and Nationalism: A Case Study of Egypt", *Die Welt Des Islams*, Vol. VII, 3-38.

El-Awaisi, Abd al-Fattah Muḥammad, (1998), *The Muslim Brothers and the Palestine Question 1928-1947*, London: Tauris Academic Studies.

Al-Banna, Hasan, (1984), *Risalah Mukhtamar Kelima al-Ikhwan Muslimin* (Terj. Alias Osman), Kuala Lumpur: Pustaka Salam.

Barakat, Halim, (1930), *The Arab World: Society, Culture, and State*, California: University of California Press.

Dekmejian, R. Hrair, (1971), *Egypt Under Nasir: A Study in Political Dynamics*, Albany, New York: State University of New York Press.

Egyptian Gazette, 15 Januari 1954.

FO 141/838, The Ikhwan Muslimin Reconsidered, 10 Disember 1942.

FO141/1005, Egypt: Political Situation, 23 September 1945.

FO141/1271, Arab Societies: Iqwan El Muslemeen, 9 Disember 1949.

FO141/1454, Egypt: Political Situation, 1 Ogos 1954.

FO371/102763, Negotiations between Egypt and UK: Reaction to Egyptian Demands for Evacuation of the Canal Zone, 27 Februari 1953.

FO371/102795, Defence Negotiations between Egypt and UK, 30 Disember 1953.

FO371/108312, Fortnightly Political Summaries for Egypt and Sudan Covering Period December 1953 to December 1954, 28 Februari 1954.

FO371/108319, Activities of the Moslem Brotherhood up to Its Dissolution in January 1954; Trials of Members of the Brotherhood in 1954, Including Former President, General Neguib, 13 Januari 1954.

FO371/73463, Political Situation in Egypt, 18 Januari 1949.

FO371/90119, Political Situation in Egypt, 1951.

Gershoni, Israel, (1986), "The Muslim Brothers and the Arab Revolt in Palestine, 1936-39", *Middle Eastern Studies*, Vol. 22, No. 3, 367-397.

Havens, Murray Clark; Leiden, Carl dan Schmitt, Karl M., (1970), *The Politics of Assassination*, California: Parentice Hall Inc.

Hopwood, Derek, (1993), *Egypt: Politics and Society, 1945-1990*, London, Routledge.

Al-Husaini, Ishak Musa, (1956), *The Moslem Brethren: The Greatest of Modern Islamic Movement*, Beirut: Khayat's College Book Cooperative.

Jurnal Al-Tamaddun, Bil. 13 (1), 2018, 13-26
Al-Jumhur al-Misri, 5 Februari 1948.

Kaplinsky, Zvi, (1954). "The Muslim Brotherhood", *Middle Eastern Affairs*, December.

Koury, Enver M., (1970), *Pattern of Mass Movement in Arab Revolutionary Progressim*, States, Hague: Mouton & Co.

Kupferschmidt, Wi, (1982), "The Muslim Brothers and the Egyptian Village", *Asia and African Studies*, Vol. 16, 157-170.

Lacouture, Jean dan Simon Lacouture, (1958), *Egypt in Transition*, London: Methuan & Co. Ltd.

Lloyd, Selwyn, (1978), *Suez 1956: A Personal Account*. London: Book Club Associates.

Lubben, Ivesa, (2016), "The Economic Ideology of Hasan al-Banna and the Egyptian Muslim Brotherhood", dalam Elsenhans, Hartmut et al. (ed.), *The Transformation of Politicised Religion: From Zealots Into Leaders*, New York: Routledge.

Malek, Anouar Abdel, (1968), *Egypt Military Society*, New York: Random House.

Middle East Report , Vol. VI, No. 3, October 1953.

The Middle Eastern Affairs, Vol. V. No. 3, March 1954.

Mitchell, Richard P., (1993), *The Society of The Muslim Brothers*, London: Oxford University Press.

Musallam, Adnan A., (2005), *From Secularism to Jihad: Sayyid Qutb and the Foundations of Radical Islamism*, Westport, CT: Praeger Publishers.

Ranko, Annette, (2014), *The Muslim Brotherhood and Its Quest for Hegemony in Egypt: State-Discourse and Islamist Counter-Discourse*, Heidelberg: Germany: Springer.

Rizvi, Nihal H., (1981), "Political Organization of a Revolutionary Rejimes: The Case of Egypt", *Hamdard Islamicus*, Vol. 4, No. 4, 53-82.

Sattar, Noman, (1995), "Al Ikhwan Al Muslimin" (Society of Muslim Brotherhood) Aims and Ideology, Role and Impact", *Pakistan Horizon*, Vol. 48, No. 2, 7-30.

Shamsul Azhar Yahya, Mohamad Redzuan Othman & Abu Hanifah Haris, (2017), "Tahalluf Siyasi Dalam Perjuangan Ikhwan al-Muslimin di Mesir, 1970-1981", *Jurnal Hadhari*, Edisi Khas, 183-193.

WO201/2647, The Moslem Brotherhood: Political Intelligence Paper.

Zollner, Barbara H.E., (2009), *The Muslim Brotherhood: Hasan al-Hudaybi and Ideology*, London: Routledge